

DOMENIE XVI «VIE PAL AN»

Antifone di jentrade Sal 53,6.8

Ve, il Signôr al vignarà a judâmi,
il Signôr al ten sù la mê vite.
Cun dut il cûr ti ufrissarai il sacrifici,
il sacrifici di laut al to non che al è bon, Signôr.

Colete

Cjale di bon voli, Signôr, i tiei servidôrs
e multiplike sore di lôr i regâi de tô gracie
par che, ferbints te fede, te sperance e tal amôr,
a condurin tal meti in vore cun fedeltât i tiei comandaments.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Sap 12,13.16-19

Tu tu dâs di mendâsi dopo dai pecjâts.

Dal libri de Sapience
No 'nd è Diu fûr di te che al vedi cûr par dut,
par che tu scuegnis dimostrâ
che no tu âs judicât cence justizie.
La tô fuarce di fat e je principi di justizie;
la tô paronance sun dut ti fâs tratâ ducj cun remission.
Di sigûr tu tu palesis la tô fuarce
cuintri di chel che nol crôt te perfezion de tô potence
e tu sbassis la temeritât di chei che le cognossin.
Ma tu, che tu sês paron de fuarce,
tu judichis cun moderazion
e tu nus rezis cun grande remission,
parcè che il podê, cuant che tu vuelis,
tu lu âs simpri a quartade.
Cun chestis voris tu i âs insegnât al to popul
che il just al à di jessi ancje uman
e tu ur âs dade ai tiei fîs la buine sperance
che tu ur darâs di mendâsi dopo dai pecjâts.
Peraule di Diu.

SALM RESPONSORIÂL dal Salm 85

R. Tu tu sês bon, Signôr, e tu perdonis.

Ve dûl di me, Signôr,
che o stoi berlant viers di te dute la zornade.
Slungje la tô orele, Signôr, cuant che ti prei,
sta atent a la mê vôs che ti sconzure. **R.**

Dutis lis gjernaziis che tu âs creadis
a vignaran di te, Signôr,
si butaran in zenoglon a la tô presince
e i daran al to non la laude.
Tu tu sês grant e tu fasis robonis;

dome tu tu sês Diu! **R.**

Ma tu, Signôr, tu sês un Diu plen di dûl e di boncûr,
pegri tal inrabiâti
e splendit te misericordie e te fedeltât.
Ven incuintrimi cul to boncûr. **R.**

SECONDE LETURE Rm 8,26-27

Il Spirt al pree par nô cun zemits che no si rive a contâju.

De letare di san Pauli apuestul ai Romans

Fradis, il Spirt nus dà une man e nus jude te nestre debolece; di fat no savìn nancje nô ce che al va ben domandât, ma al è propit il Spirt che al pree par nô cun zemits che no si rive a contâju. Ma chel che al staze i cûrs, al sa ce che al pense e al breme il Spirt, parcè che al domande pai sants seont il volê di Diu.

Peraule di Diu.

CJANT AL VANZELI cf. Mt 11,25

R. Aleluia, aleluia.

Benedet sêstu tu, Pari, Signôr dal cîl e de tiere,
parcè che ai piçui tu âs palesât i misteris dal ream dai cîi.

R. Aleluia.

VANZELI Mt 13,24-43

Lassait che a cressin ducj i doi fintremai al racolt.

Dal vanzeli seont Matieu

In chêt volte, Jesù al contà a la fole une parabule: «Il ream dai cîi al è compagn di un om che al semenà semence buine tal so cjamp. Biel che i oms a durmivin, al rivà il so nemì, al semenà framieç dal forment la vrae e si slontanà. Cuanche il forment al diventà grant e al rivà al spi, in chêt volte e comparì ancje la vrae. I servidôrs a lerin dal paron e i diserin: Paron, no âstu forsit semenade semence buine intal to cjamp? Cemût mai cumò ind ise vrae? Ur rispuindè: Cheste me à fate il nemì. I servidôrs i disin: Vuelistu che o ledin a gjavâle fûr di lidrîs? E lui: No, parcè che al è pericol che, gjavant di lidrîs la vrae, o gjavais di chêt strade ancje il forment. Lassait che a cressin ducj i doi fintremai al racuelt; te stagjon dal racuelt ur disarai ai seseladôrs: Ingrumait prime la vrae e peaitle in balçûi par brusâle; po o cjapais sù il forment pal gno cjast».

Ur contà un'altre parabule disint: «Il ream dai cîi al è compagn di un grignel di senape che un om al cjapà e lu semenà tal so cjamp. E je di sigûr la plui piçule di dutis lis semencis, ma cuanche al è cressût al è il plui grant di dutis lis jerbis dal ort: al pues diventà ancje un arbul e cussì i ucei dal cîl a puedin vignî a fâ il nît framieç dai siei ramaçs».

Ur contà un'altre parabule: «Il ream dai cîi al è compagn di un pugn di levan che une femine e cjape e lu messede in trê misuris di farine, fin che dute la paste no je jevade».

Dutis chestis robis Jesù ur es disè a lis folis in parabolis e ur fevelave dome in parabolis, par che si colmàs ce che al veve nunziât il profete, là che al dîs: “O vierzarai la mê bocje in parabolis o publicarai robis platadis fin de fondazion dal mont”.

Alore, lassade la int, al jentrà in cjase e i siei dissepui i lerin dongje disint: «Spieghinus mo la parabule de vrae tal cjamp». Ur rispuindè: «Chel che al semene la buine semence al è il Fi dal om; il cjamp al è il mont; la semence buine e je il spieli dai fîs dal ream e la vrae invezit dai fîs dal mâl; il nemì che le à semenade al è il diaul; il seselâ al è la fin dal mont e i seseladôrs a son i agnui. Come che si ingrume la vrae e si brusile tal fûc, cussì al sucedarà a la fin dal mont: il Fi dal om al mandarà i siei agnui a tirâ dongje dal so ream ducj i scandui e ducj chei che a fasin dome mâl, par butâju te fornâs infogade. Li al sarà dut un vaî e un crustâ di dincj. Alore i juscj a lusaran come il soreli tal ream di lôr Pari. Chel che al à orelis, che al scolti!».

Peraule dal Signôr.

Su lis ufiertis

Diu, che inte perfezion di chest unic sacrifici
tu âs consacrade la diference cu lis vitimis de leç viere,
acete il sacrifici dai tiei servidôrs fedêi,
santifichilu come che tu âs santificât i regâi di Abêl
e ce che ognidun al ufrîs a la tô maiestât,
che al zovi pe salvece di ducj.
Par Crist nestri Signôr.

Antifone a la comunion Sal 110,4-5

Al à lassade memorie dai siei spetacui:
al à dûl il Signôr e al è bon di cûr,
ur à dade la bocjade a di chei che lu rispjetin.

O ben: Ap 3,20

Ve: jo o stoi a la puarte e o tuchi, al dîs il Signôr.
Se un al scolte la mê vôs e mi vierç la puarte,
o jentrarai li di lui, o cenarai cun lui e lui cun me.

Daspò de comunion

Signôr, ti preìn, cjale di bon voli il to popul
e, daspò di vêlu inscuelât cui misteris dal cîl,
dai di passâ de viere a la gnove vite.
Par Crist nestri Signôr.